

**BOSNA I HERCEGOVINA**  
**FEDERACIJA BOSNE I HERCEGOVINE**  
**UNSKO-SANSKI KANTON**  
**GRAD BIHAĆ**  
**GRADONAČELNIK**  
Služba za opću upravu i društvene djelatnosti

Broj: 07/2-11-1785  
Bihać, 12.04.2021.godine

Na osnovu člana 183. stav (2) Poslovnika Gradskog vijeća („Službeni glasnik Grada Bihaća“ broj 3/16), a u vezi sa članom 52. stav 1. tačka c. Statuta Grada Bihaća („Službeni glasnik Grada Bihaća“ broj 13/15 i 13/18) Gradonačelnik u svojstvu predlagača propisa i drugih akata

**ODREĐUJE**

Izjestioca Daria Jurića, šefa odsjeka za društvene djelatnosti, u Službi za opću upravu i društvene djelatnosti, na sjednici Gradskog vijeća i radnim tijelima po prijedlogu tačke dnevnog reda:

Prijedlog Odluke o finansiranju troškova prevoza učenika  
srednjih škola u Gradu Bihaću za 2021. godinu

Gradonačelnik  
Šuhret Fazlić

**BOSNA I HERCEGOVINA**  
**FEDERACIJA BOSNE I HERCEGOVINE**  
**UNSKO-SANSKI KANTON**  
**GRAD BIHAĆ**  
**GRADONAČELNIK**

Broj: 07/2-11-1785

Bihać, 12.04. 2021. godine

**GRADSKO VIJEĆE BIHAĆ**

Na osnovu člana 52. Statuta Grada Bihaća („Službeni glasnik Grada Bihaća“ broj 13/15 i 13/18) i člana 140. Poslovnika Gradskog vijeća Bihać („Službeni glasnik Grada Bihaća“ broj 3/16), Gradonačelnik Gradskom vijeću Bihać dostavlja na razmatranje radi donošenja

Odluka  
o finansiranju troškova prevoza učenika  
srednjih škola u Gradu Bihaću za 2021. godinu

(Prijedlog)

**Obrazloženje**

**I PRAVNI OSNOV**

Pravni osnov za donošenje Odluke o finansiranju troškova prevoza učenika srednjih škola u Gradu Bihaću za 2021. godinu sadržan je u:

- članu 12. stav (3) tačka 1) Zakona o lokalnoj samoupravi Unsko-sanskog kantona („Službeni glasnik Unsko-sanskog kantona“ broj 8/11), koji propisuje da: “U vlastite nadležnosti jedinica lokalne samouprave posebno spadaju, između ostalog; ocjenjivanje rada ustanova i kvaliteta usluga u djelatnosti zdravstva, socijalne zaštite, obrazovanja, kulture i sporta te osiguranje finansijskih sredstava za unapređenje njihovog rada i kvaliteta usluga u skladu sa potrebama stanovništva i mogućnostima jedinice lokalne samouprave.”

- u članu 35. tačka c) Statuta Grada Bihaća („Službeni glasnik Grada Bihaća“ broj 13/15 i 13/18) koji propisuje da Gradsko vijeće u okviru samoupravnog djelokruga donosi odluke i druge opće akte kojima uređuje pitanja iz samoupravnog djelokruga Grada i daje njihovo tumačenje, i

- u članu 35. tačka jj) navedenog Statuta koji reguliše da Gradsko vijeće u okviru samoupravnog djelokruga ocjenjuje rad ustanova i kvalitet usluga u djelatnosti zdravstva, socijalne zaštite, obrazovanja, kulture i sporta najmanje jednom godišnje, te osigurava

finansijska sredstava za unapređenje njihovog rada i kvaliteta usluga u skladu sa potrebama stanovništva i mogućnostima Grada.“

## **II RAZLOZI ZA DONOŠENJE**

U decembru 2017. godine Gradsko vijeće je donijelo Odluku o finansiranju troškova prevoza učenika srednjih škola u Gradu Bihaću broj: GV-14-8 484/17 od 21.12..2017. godine, koja se primjenjuje do decembra 2018. godine te je isto nastavljeno i Odlukom za 2019. i 2020. godinu. Cijeneći i dalje da je većina stanovništva siromašna, te da se na ovaj način nastoji pomoći djeci koja idu u srednju školu na području grada Bihaća, postoji opravdan razlog za prijedlog ove nove Odluke, jer bi se na ovaj način nastavilo finansiranje učenika srednjih škola u 2021. godini. Činjenica je da zaposleni koji žive u porodicama s djecom imaju niska primanja tako da jedna plata nije dovoljna podmiri i troškove prevoza učenika, a da ne govorimo o onima koji nemaju nikakva primanja, kao kategorije korisnika socijalne zaštite kao što su djeca bez roditeljskog staranja, djeca čiji razvoj ometaju porodične prilike, invalidi i osobe sa poteškoćama u razvoju te osobe i porodice koje su u stanju socijalne potrebe uslijed posebnih okolnosti itd.

U 2020. godini troškovi za prevoz učenika iznosili su 54.526,40 KM, što je u odnosu na 2019. godinu, u kojoj je izdvojeno 182.064,80 KM, manje za 127.538,40 KM. Prema Financijskom izvještaju o poslovanju JU „Centar za socijalni rad“ Bihać, troškovi za prevoz učenika iznosili su 8.463,50 KM, za mjesec decembar 2020. godine.

Finansiranjem troškova prevoza učenika srednjih škola obuhvaćene su sve navedene kategorije, a glavni cilj je da se pomogne onim učenicima kojima je pomoć stvarno i neophodno potrebna .

## **III FINANSIJSKA SREDSTVA**

Za realizaciju ove Odluke u Budžetu grada Bihaća za 2021. godinu planirana su sredstva u iznosu od 250.000 KM.

Prilog: Prijedlog Odluke

Gradonačelnik  
Šuhret Fazlić

Na osnovu člana 12. stav (3) tačka 1) Zakona o lokalnoj samoupravi Unsko-sanskog kantona („Službeni glasnik Unsko-sanskog kantona“ broj 8/11) i člana 35. tačka jj) Statuta Grada Bihaća („Službeni glasnik Grada Bihaća“ broj 13/15 i 13/18), Gradsko vijeće Grada Bihaća na sjednici održanoj dana 2021. godine, donijelo je:

**ODLUKU  
O FINANSIRANJU TROŠKOVA  
PREVOZA UČENIKA SREDNJIH ŠKOLA U  
GRADU BIHAĆU ZA 2021. GODINU**

**DIO PRVI - OPĆE ODREDBE**

**Član 1.**

Ovom Odlukom utvrđuju se korisnici, kriteriji i način finansiranja troškova javnog prevoza redovnih učenika srednjih škola, sa prebivalištem na području grada Bihaća, u periodu februar-juni, te septembar-decembar 2021. godine, pravo na finansiranje troškova prevoza određenih kategorija učenika srednjih škola, uslovi za sticanje i prestanak prava na finansiranje troškova prevoza određenih kategorija učenika srednjih škola, nadležnost i postupak za priznavanje i prestanak prava na finansiranje troškova prevoza određenih kategorija učenika srednjih škola, finansiranje troškova i druga pitanja od značaja za finansiranje sredstvima Budžeta Grada Bihaća u troškovima prevoza učenika srednjih škola.

**DIO DRUGI- KORISNICI**

**Član 2.**

(1) Pravo na finansiranje troškova prevoza imaju samo učenici srednjih škola čija je udaljenost od mjesta prebivališta do mjesta sjedišta škole najmanje 5 (pet) kolometara, a pripadaju jednoj od slijedećih kategorija:

- a) djeca bez roditeljskog staranja,
- b) djeca čija oba roditelja nemaju primanja po bilo kom osnovu bez obzira na broj djece,
- c) djeca sa invaliditetom,
- d) djeca roditelja koji se sami staraju o djetetu, roditelja bez primanja ili primanja koja ne prelaze iznos jedne prosječne neto plate isplaćene u F BiH u posljednja 3 mjeseca, a prema zvaničnim podacima objavljenim u Federalnom Zavodu za statistiku,
- e) ukoliko u porodici ima jedan učenik srednje škole, a primanja u domaćinstvu po bilo kom osnovu ne prelaze iznos jedne prosječne neto plate isplaćene u F BiH u posljednja 3 mjeseca, a prema zvaničnim podacima objavljenim u Federalnom Zavodu za statistiku, ostvaruje pravo na subvenciju troškova prevoza,
- f) ukoliko u porodici ima dva ili više učenika srednje škole, a primanja u domaćinstvu po bilo kom osnovu ne prelaze iznos 1,5 prosječne neto plate isplaćene u F BiH u posljednja 3 mjeseca, a prema zvaničnim podacima objavljenim u Federalnom Zavodu za statistiku, pravo na subvenciju troškova prevoza ima drugo, treće i više djece.

(2) Djeca sa invaliditetom imaju pravo na subvenciju troškova prevoza bez obzira na udaljenost od mjesta prebivališta do mjesta sjedišta škole.

(3) Za učenike iz stava (1) ovog člana mjesečna karta za prevoz do škole i nazad će se finansirati u 100 % iznosu.

## **DIO TREĆI- USLOVI ZA STICANJE PRAVA NA FINANSIRANJE**

### **Član 3.**

(1) Postupak ostvarivanja prava na finansiranje troškova prevoza učenika srednjih škola iz člana 2. ove Odluke pokreće se podnošenjem zahtjeva na kojem će podnosilac naglasiti kojoj kategoriji pripada.

(2) Svaki podnosilac zahtjeva uz zahtjev je dužan dostaviti slijedeću dokumentaciju:

- a) Izvod iz matične knjige rođenih,
- b) Kućna lista,
- c) Uvjerenje Kantonalnog ministarstva unutrašnjih poslova-Odsjek za administraciju o prebivalištu na području Grada Bihaća (PBA-1 obrazac),
- d) Uvjerenje o pohađanju srednje škole,
- e) Bankovni račun,
- f) Potvrdu prevoznika o cijeni mjesečne karte.

(3) Djeca čija oba roditelja nemaju primanja po bilo kom osnovu su dužna dostaviti:

- a) Potvrdu o nezaposlenosti oba roditelja,
- b) Ovjerenu izjavu oba roditelja da nemaju druga redovna primanja po bilo kom osnovu.

(4) Djeca sa invaliditetom su dužna dostaviti pored tražene dokumentacije iz stava (2) ovog člana:

(a) dokaz o invalidnosti, odnosno Rješenje nadležnog organa ili komisije, po propisima iz penzijskog i invalidskog osiguranja F BiH, kojim je utvrđena invalidnost.

(5) Djeca koja pripadaju kategoriji gdje u porodici ima jedan učenik srednje škole, odnosno 2 ili više učenika, a gdje se ostvaruju primanja manja od 1 prosječne neto plate, odnosno 1,5 prosječne neto plate isplaćene u F BiH u posljednja 3 mjeseca, a prema zvaničnim podacima objavljenim u Federalnom zavodu za statistiku su dužna pored dokumentacije iz stava (2) ovog člana dostaviti slijedeće dokaze:

- a) Potvrdu poslodavca o radnom odnosu i visini primanja (za zaposlene),
- b) Ček od penzije (za penzionere),
- c) Drugi dokument kojim se dokazuje visina primanja u domaćinstvu,
- d) Ovjerenu izjavu roditelja da nemaju drugih primanja, izuzev onih koja su navedena u Zahtjevu.

(6) Djeca roditelja koji se sami staraju o djetetu, bez primanja ili primanja koja ne prelaze iznos jedne prosječne neto plate isplaćene u F BiH u posljednja 3 mjeseca, a prema

zvaničnim podacima objavljenim u Federalnom zavodu za statistiku, su dužna pored dokumentacije iz stava (2) ovog člana dostaviti slijedeće dokaze:

- a) Potvrdu poslodavca o radnom odnosu i visini primanja oba roditelja (ukoliko ima primanja),
- b) Ček od penzije (za penzionere),
- c) Drugi dokument kojim se dokazuje visina primanja u domaćinstvu (ukoliko ima primanja),
- d) Potvrdu o nezaposlenosti oba roditelja ( za nezaposlene)
- e) Ovjerenu izjavu oba roditelja da nemaju drugih primanja, izuzev onih koja su navedena u Zahtjevu.
- f) Dokaz da se jedan roditelj sam stara o djetetu (ako je drugi roditelj preminuo, ako je drugi roditelj proglašen umrlim, ako se drugi roditelj ne stara o djetetu, ako je drugi roditelj nepoznatog boravišta, ako je drugom roditelju oduzeta ili ograničena poslovna sposobnost i ako je drugom roditelju oduzeto roditeljsko staranje).

(7) Zahtjevi i izjave se mogu dobiti besplatno u JU“ Centar za socijalni rad“ Bihać, na šalteru grada Bihaća i matičnim uredima.

## **DIO ČETVRTI - PRESTANAK PRAVA NA FINANSIRANJE**

### **Član 4.**

Pravo na finansiranje troškova prevoza učenika srednjih škola, iz člana 2. ove Odluke prestaje:

- a) kad učenik izgubi status redovnog učenika srednje škole,
- b) kad učenik promijeni porodični status, odnosno promijeni se socijalni i materijalni status porodice učenika,
- c) kad učenik iz bilo kojih razloga prestane koristiti usluge finansiranja prevoza,
- d) kad nastupe okolnosti od uticaja za prestanak prava na finansiranje.

## **DIO PETI - NADLEŽNOST I POSTUPAK ZA PRIZNAVANJE I PRESTANAK PRAVA NA FINANSIRANJE**

### **Član 5.**

O pravu na finansiranje troškova prevoza određenih kategorija učenika srednjih škola i prestanku tog prava, a po zahtjevu jednog od roditelja odnosno staratelja djeteta, ili po službenoj dužnosti u prvom stepenu odlučuje JU“ Centar za socijalni rad“ Bihać.

### **Član 6.**

(1) Zahtjev za ostvarivanje prava na finansiranje troškova prevoza sa dokumentacijom navedenom u članu 3. ove Odluke, učenici su dužni dostaviti u JU „Centar za socijalni rad“ Bihać na nadležno postupanje koji, nakon utvrđivanja formalnih i materijalnih uslova donosi Rješenje o ostvarivanju prava na finansiranje troškova prevoza.

(2) Rješenje iz stava (1) ovog člana JU „Centar za socijalni rad“ Bihać je dužno donijeti u roku od 30 dana od dana prijema zahtjeva i primjerak istog dostaviti Službi za opću upravu i društvene djelatnosti.

(3) U postupku za priznavanje i prestanak prava na finansiranje troškova prevoza određenih kategorija učenika srednjih škola, primjenjuju se odredbe Zakona o upravnom postupku.

(4) Korisnik prava na finansiranje dužan je organu koji je u prvom stepenu odlučivao o pravu na finansiranje, prijaviti svaku promjenu koja je od uticaja za ostvarivanje, obim ili prestanak prava, u roku od 15 dana od dana nastanka promjene.

(5) Korisniku prava na finansiranje koji je u 2020. godini ispunjavao uvjete navedene u Odluci o finansiranju troškova prevoza učenika srednjih škola u Gradu Bihaću za 2020. godinu, će se pravo produžiti bez ponovnog provođenja postupka, a na osnovu potvrde o pohađanju srednje škole.

### **Član 7.**

(1) Protiv prvostepenog rješenja o priznavanju, odnosno prestanku prava na finansiranje troškova prevoza može se podnijeti žalba.

(2) Žalba se podnosi Komisiji za žalbe Gradskog vijeća Bihać u roku od 15 dana od dana dostavljanja rješenja, a predaje se neposredno ili šalje poštom organu koji je donio prvostepeno rješenje.

## **DIO ŠESTI - FINANSIRANJE TROŠKOVA PREVOZA**

### **Član 8.**

(1) Pravo na finansiranje troškova prevoza određenih kategorija učenika srednjih škola, finansira se iz Budžeta Grada Bihaća.

(2) Osnovicu za izračunavanje učešća Budžeta Grada Bihaća u finansiranju troškova prevoza određenih kategorija učenika srednjih škola, predstavlja cijena mjesečne karte.

(3) Kopije mjesečnih karata ili potvrdu prevoznika učenici su dužni dostaviti u JU „Centar za socijalni rad“ Bihać, radi provođenja kontrole utroška doznačenih sredstava.

### **Član 9.**

(1) Služba za finansije će nakon podnešenog zahtjeva za doznačena sredstva od strane JU „Centar za socijalni rad“ Bihać, doznačiti utvrđeni mjesečni iznos JU „Centar za socijalni rad“ Bihać.

(2) JU „Centar za socijalni rad“, Bihać će doznačena sredstva uplatiti na bankovni račun učenika ili bankovni račun jednog od roditelja, odnosno staratelja do 30-tog u mjesecu za naredni mjesec, ukoliko su pravdali sredstva za prethodni mjesec.

### **Član 10.**

(1) Sredstva za realizaciju ove Odluke obezbijedena su u Budžetu Grada Bihaća za 2021. Godinu, u iznosu od 250.000,00 KM.

(2) Grad Bihać može privremeno ili trajno prekinuti finansiranje troškova prevoza učenika, ukoliko dođe do znatnog smanjenja prihoda zbog objektivnih okolnosti na koje Grad Bihać nije mogao uticati.

## **DIO SEDMI- NADZOR**

### **Član 11.**

Nadzor nad provođenjem odredaba ove Odluke vršit će Služba za opću upravu i društvene djelatnosti, JU „Centar za socijalni rad“ Bihać i Služba za finansije, svako u okviru svoje nadležnosti.

### **Član 12.**

Grad Bihać zadržava pravo praćenja utroška sredstava doznačenih JU „Centar za socijalni rad“ Bihać, te preispitivanje namjenskog utroška doznačenih sredstava.

## **DIO OSMI- ZAVRŠNA ODREDBA**

### **Član 13.**

Ova Odluka stupa na snagu osmog dana od dana objavljivanja u Službenom glasniku Grada Bihaća.

Gradsko vijeće  
Broj:  
Bihać,

Predsjedavajući Gradskog vijeća  
Zulfikar Handukić